

道家部

淮南子卷

51

華東師範大學

「子藏」編纂中心編

總編纂 方勇

副總編纂 吳平

子藏

國家圖書館出版社

子藏

道家部

淮南子卷

51

華東師範大學
「子藏」編纂中心編

總編纂 方勇

副總編纂 吳平

國家圖書館出版社

第五十一冊目錄

淮南雜識四卷(卷三至四)

(清)聞益編
清道光二十五年(1845)鎮洋聞維埭刊本

淮南子周易古義二卷附補佚一卷

(清)胡兆鸞撰
抄本《七略盒抄書》

讀淮南子

(清)楊琪光撰
清光緒十一年(1885)刊《枉川別集·百子辨正》本

周易淮南九師道訓一卷

(清)馬國翰輯
清光緒九年(1883)長沙娜嬛館刊《玉函山房輯佚書》本

淮南子校書一卷

(清)于邕撰
手稿本《香草續校書》

淮南天文訓補注二卷(卷上)

(清)錢塘撰
清道光八年(1828)嘉定縣署刊本

一
一六一
三一
三一
三一
三二五
四〇三

淮南雜識卷三



鎮洋聞 益省謙編

高祖

日知錄漢儒以曾祖之父爲高祖考之於傳高祖者遠祖之名爾左傳郊子來朝曰我高祖少皞摯之立也則以始祖爲高祖書盤庚肆上帝將復我高祖之德康王之誥無壞我高祖寡命則以受命之君爲高祖今攷爾雅釋親曾祖王父之考爲高祖王父曾祖王父之妣爲高祖王母則以曾祖之父爲高祖不始於漢儒

家公

顏氏家訓漢侯霸子孫稱祖父曰家公又曰河北士人皆

呼外祖父爲家公後漢書范巨公傳王霸之子稱父爲家公世說陳元方對父客曰君與家君期日中則又稱父爲家君矣

大人公

顏氏家訓北閒風俗婦呼舅爲大人公

親戚

史記宋世家箕子者紂親戚也韓詩外傳親戚旣沒雖欲孝誰爲孝此謂其父母左傳封建親戚以蕃屏周此謂其子弟三國志張昭謂孫權曰况令姦宄競逐豺狼滿道迺欲哀親戚顧禮制此謂其父兄

至親

漢諸帝以同父兄弟爲至親如景帝以梁孝王武至親有功賜天子旌旗昭帝以燕王旦至親勿治而齊孝王孫澤中山哀王子長皆伏誅成帝時惟中山定陶二人於帝爲至親

支婆

家世舊聞宋俗稱諸庶母爲支婆曲禮庶子本稱支子

親家

隋書宇文述子士及尙煬帝蘭陵公主述奏李金才反狀帝覽之泣曰吾宗祏幾傾賴親家公而得全舊唐書蕭嵩子衡尙新昌公主妻賀氏入覲拜席元宗呼爲親家母盧綸作王駙馬花燭詩云人主人臣是親家親字作去聲

謂妻爲妻子

韓非子鄭縣人十子使其妻爲袴其妻問曰今袴何如夫曰象吾故袴妻子因毀新令如故袴

民母

漢書衛青傳民母之子皆奴畜之服虔曰民母嫡母也

祖孫

日知錄自父而上之皆曰祖書微子之命曰乃祖成湯是也自子而下之皆曰孫詩閟宮之篇曰后稷之孫實維大王是也

姁屬

眷親屬也亦作姁見史記樊噲傳又按唐書宰相世系表

有西眷裴中眷裴東眷裴之號是同姓亦可稱眷矣

丈人

丈人之稱始見於周易王弼註嚴莊之稱也繼又見於魯論包咸註老人也戰國策嚴遂奉黃金百鎰爲聶政母壽曰爲丈人粗糲之費是女人尊者亦稱丈人樂府大婦織綺羅中婦織流黃小婦無所爲挾瑟上高堂丈人且安坐調絲方未央是舅姑皆可稱丈人若以此稱妻父不知始於何時裴松之宋元嘉時人也其註三國志獻帝舅車騎將軍董承句下云古無丈人之名故謂之舅則其來亦久矣

泰山

張燕公說爲封禪使厥壻鄭鎰驟遷五品官元宗驚異黃
詹綽徐進曰此無他皆泰山之力也後人沿之遂爲婦翁
號或云泰山本有丈人峯黃潛筆記引漢郊祀志云大山
川有岳山小山川有壻山岳而有壻則大岳可謂婦翁矣
世俗稱謂因岳山轉爲泰山耳

丈母

柳子厚祭楊憑文子壻謹以清酌庶羞之奠昭祭於丈人
之靈此稱妻父爲丈人之證又有祭獨孤氏丈母文則更
稱妻母爲丈母若通鑑載韓滉稱劉元佐之母爲丈母是
又女人尊者之通稱

先後

漢書郊祀志見神於先後宛若孟康曰兄弟妻相謂先後師古曰古謂之娣姒今關中俗呼爲先後吳楚俗呼之爲妯娌

邱嫂

漢書高祖微時過其邱嫂食嫂厭之陽爲羹盡轅釜註邱大也轅音勞轅也

糞土息

自稱子曰糞土息出說苑女曰息女出漢書

女壻稱謂

女壻曰倩出漢書兩壻相謂曰亞江東人呼爲僚壻嚴助爲友壻所辱註同門之壻也唐書咸安公主下嫁可汗上

書昔爲兄弟今爲半子蘇軾詩王郎非嬌客則壻亦稱嬌客公羊傳註就親曰綴壻

宗袞

謝眺以謝安爲宗袞其詩曰阨危賴宗袞微管寄明牧

洪支

前漢哀帝紀彫落洪支猶言大族也

宗家

韋賢傳門下生博士義倩等與宗家計議謂同族也

布代

潛居錄馮布少時絕有才幹贅於孫氏其婦翁有煩瑣事輒曰命布代之故人至今呼壻爲布代

下妻

漢王莽二年有男子遮立國將軍車曰漢氏劉子輿成帝下妻子也元后傳多取傍妻公羊莊十九年傳諸侯不再娶何休註所以節人情開媵路

常棣碑

賈敦頤敦實兄弟皆有美跡立碑號常棣碑沈淡弟深冲皆爲御史中丞名譽有優劣人號爲腰鼓兄弟

重臺

婢妾年久而衰退者謂之房長亦曰房老婢之婢曰重臺羊欣書似婢作夫人米芾學欣書高宗謂米字爲重臺

曾孫

日知錄曰夢溪筆談喪服但有曾祖曾孫而無高祖元孫
或曰經之所不言則不服是不然曾重也自祖而上者皆
曾祖也自孫而下者皆曾孫也雖百世可也苟有相逮者
則必爲服喪三月

娘子

婦人相稱謂無論大小家率云娘子柴紹妻平陽公主起
兵於司竹置幕府號娘子軍楊太真入宮宮中呼爲娘子
花蕊宮詞諸院各分娘子位韓昌黎有祭周氏二十娘子
文夢華錄杭人議親帖子開寫第幾位娘子蓋當時女子
在母家卽稱娘子矣霍小玉傳李益呼小玉曰小娘子

快婿

魏書劉昞年十四就郭瑀學瑀有女及笄廣選良耦時瑀有弟子五百餘人通經業者八十餘人乃別設一席於座前謂諸弟子曰吾有一息年向長成欲擇一快婿誰坐此席者昞奮衣來坐而神色肅然瑀遂以女妻之

佳口

周文謂尉遲綱曰事平當賞汝佳口謂佳婦也

寶爻

京房易傳子孫爲寶爻

孤露

魏晉間人以父亡爲孤露嵇康與山巨源絕交書少加孤露

側室

漢書南粵傳朕高皇帝側室之子師古曰言非正嫡所生非也左傳卿置側室杜解衆子也又趙有側室曰穿

處妾

五行志處妾遇之而孕註處妾宮中之處女

釵鏤王家

鄭盧李崔皆爲甲族太原王亦四姓之匹而呼爲釵鏤王家喻銀質而金飾

叔姪亦稱父子

漢疏廣疏受本叔姪也而漢書則云太傅在前少傅在後父子並爲師傅則叔姪亦可稱父子唐房式與房次鄉亦

叔姪也而昌黎作興元少尹房君墓誌敘述房式之言則曰子與吾兒次鄉遊則叔之稱姪亦可云吾兒矣

兄弟之子稱姪

困學紀聞顏延之曰伯叔有父名則兄弟之子不得稱姪從母有母名則姊妹之子不可言甥且姪甥唯施於姑舅耳雷次宗曰姪字有女明不及伯叔甥字有男見不及從母劉貢父刊二程先生集改姪爲猶子朱文公謂古人固不稱姪亦無云猶子者但云兄之子弟之子而已然呂氏春秋黎邱部有奇鬼焉喜效人之子姪昆弟之狀是先秦已稱兄弟之子爲姪矣

稱舅姑爲公婆

古詩便可白公姥及時相遣歸乃謂舅爲公也晉樂府後來新婦今爲婆乃謂姑爲婆也

八子七壻

唐書郭子儀傳八子七壻皆貴顯朝廷

小茶

元好問詩牙牙嬌女總堪誇學念新詩似小茶註唐人以茶爲小文美稱

昆玉

南史王玠傳子琳娶梁武帝妹有子九人並知名時人以爲玉昆金友釋常談長兄謂之元昆韋賢傳茅土之繼在我俊兄後漢光武紀其布告天下令知忠臣孝子慈兄悌